



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 7

Israel nung sorkar tasen tentet; Netanyahu mapang süyio

Centre sorkar den ken o jembitsü melunga lir: Rakesh Tikait



VOL. XVIII NO. 241 (ADOK 241) DIMAPUR

SANGTENNÜ (TUESDAY)

AAMI (JUNE) 15, 2021

₹ 5.00

## COVID-19 Nagaland: Taneptsü angur 81.8% kümogo

**Kohima, June 14, 2021 (TYO):** Nagaland nung anogo 9 buba COVID-19 puteter dang nungibo taneptsü angur timba liasü aser iba ajanga taneptsü angur 81.80% kümogo.

Hombarnü COVID-19 puteta alir nisung 405 taneptsü angur aser 109 dak putet.

"Tanü nisung 109 dak COVID-19 putet. Parnokji Mokochung nung nisung 52, Kohima nung 26, Dimapur nung 14, Mon nung 7, Zunheboto nung 5, Wokha nung 2 aser Peren, Phek o Tuensang nung kaka (1) lir. Parnok züngsema COVID-19 puteter ajak agi nisung 23,753 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü COVID-19 puteta alir nisung 405 taneptsü angur. Parnokji Dimapur nung nisung 238, Kohima nung 122, Mon

nung 22, Phek nung 8, Zunheboto nung 6, Peren nung 4, Tuensang nung 3 aser Longleng nung 2 lir. Parnok züngsema taneptsü angur ajak agi nisung 19,431 kümogo" ta paisa metetdaksü.

Tang Nagaland nung nisung 3,201 anepaludar. Külen, tanü COVID-19 puteta alir nisung 3 asüba züngsema tasür ajak agi nisung 456 kümogo. Hombarnü Kiphire, Kohima aser Tuensang nung nisung kaka asü, ta Dr Kikon-isa metetdaksü.

"Deobar tashi nung nisung 2,88,955 nem COVID-19 vaccine indang dose 3,43,671 agütsüo" ta State Immunization Officer, Dr Ritu Thurr-ia ashi.

"Vaccine agirtem rongnung nisung 54,716-i dose anaprong agiogo. Parnokji frontline workers 28,124, healthcare workers 10,303 aser arishi küm 45 ser temapur 16,289 lir," ta Dr Thurr-isa ashi.

## ANCSU-i state sorkar nem Jun 20 tashi mapang agütsür

**Dimapur, June 14, 2021 (TYO):** All Nagaland College Students' Union (ANCSU)-i Nagaland Chief Secretary dang Khelhoshe Polytechnic (KPA), Atoizu nung AICTE-NEQIP Fund amshiba osang June 20, 2021 tashi nung metetdaksü atema mapang atakzüksüo.

ANCSU-i iba ken o atema digital protest agia aruba sülen October 17, 2020 nü KPA nung AICTE-NEQIP sentotsü amshiba bushisingdangtsü atema Enquiry Committee ka tentet, ta ANCSU-i Chief Secretary dang ashi.

"Shitakba agibo Enquiry Committee nem ita asem tsüingda bushisingdangtsü mapang züngzüksü saka mapang süika state

sorkari iba ken o atema ola madoker. KPA nung AICTE-NEQIP kübok senotsü amshiba atema state sorkari nangzükpet nangzüka arur saka iba amai dang moudaksütsü. Enquiry Committee-i osang magütsüba ta parnok tashimaitba mesüra state sorkari iba mapa inyakertem kümzüksü atema inyakba mapa ka amai sayur" ta ANCSU-isa metetdaksü.

"Anungji, June 20, 2021 tashi nung committee report magütsüba aser onoki temeten mangu tashi onoki 'Digital Protest' tuluba nung inyaktsü" ANCSU President Vimeyiekho Vitso aser Vice President Inato Y Chisho nati Nagaland Chief Secretary dang ashi.

## Global Naga Forum-i Assam CM Sarma dangi shidi zülü

**Dimapur, June 14, 2021 (TYO):** Global Naga Forum (GNF)-i Assam chief minister Himanta Biswa Sarma dang Assam nung Rengma Naga nung indang putiotsü metettsü atema shidi ka zülüo.

Assam CM Sarma-i Karbi Anglong Autonomous Territorial Council (KAATC) tentettsü atema mapa inyakba mapang ka nung GNF-i iab shidi zülü.

"Tesüiba mapangtem Rengma nung putiotsü aser yimten temeten agiena liasü saka tang aser tarutsü nungbo kasa meinyaktsü imlar" ta parnok CM Sarma dang ashi.

Centre sorkar agizüka CM Sarma-i aniba state sorkari KAATC tentetba ajanga Karbi Anglong nung telungpur telok balala den yimjung yanglutsü merangba atema pelar. Iba ajanga asenek tesem nung temelenshi

tajung angutsü amanger, ta GNF-isa metetdaksü.

Assam nung Rengma Naga nung yimjung meimertem lir aser Karbi Anglong ta ajaba tesemtem nung tanga kintem den tsükchitep kecha mali. Assam nung Rengma Naga nung tashi tuluba angutsü atema Indo-Naga yimten olemtep dak metaloka lir, ta GNF-isa ashi.

"Parnok tanga Naga nung aliba tesemtem den lokteptsü mesüra Assam nung Naga nung atema Autonomous Territorial Council ka kübok adentsü akok. Tanü putu nung nisung akak nem kasa temeten agütsütsü anungji Assam chief minister-i Rengma Naga nung atema mapa shitak inyaktsü imlar" ta GNF-isa ashi.

Iba shidi nung GNF convener Chuba Ozukum aser co-convener Dr. Rosemary Dzuvichu nati sign süa lir.

## Nagaland sorkari aayanger 30,000 nem 'relief package' agütsütsü

**Kohima, June 14, 2021 (TYO):** Nagaland sorkari District Disaster Management Authority (DDMA) 12 nung Chairman ajak dang COVID-19 lockdown ajanga timtem ajuruba aayangertem yaritsü tetuyuba agütsüo.

"Timtemertem aser anogoshi aayangertem timtem ajuruba yariteptsü atema state sorkari District Task Force ajanga food rations maneni agütsütsü" ta Chief Minister Neiphiu Rio-i ashi.

Nisung 30,000 nem jang aser tanga nungdakattem agütsütsü ta Home Department, Nagaland State Disaster Management Authority-i metetdaksü.

DDMA temi osang agütsüba nung ajemdaker district 12 nung nisung 30,000 nem 'essential relief packages' agütsütsü aser

iba nung Rs 1.65 crores endoktsü. Iba nung jang maden kechiyong Department of Food & Civil Supplies-i district shia nem jang agütsütsü.

June 10, 2021 nü Principal Secretary, R Ramakrishnan IAS-i DDMA ajak dang relief package agütsütsü atema mapa inyaktsü aser tekaratiba nung anogoshi aayanger ket tongtsütsü atema tetuyuba agütsüo.

### KOHIMA NUNG DRY RATION RELIEF PACKAGE AGÜTSÜ:

Nagaland nung COVID-19 containment zone aser lockdown temangba hopta nung District Disaster Management Authority (DDMA) Kohima-i tanü anogoshia aayangertem nem relief agütsüo.

Khouchiezie Kohima Local

ground nung Kohima Deputy Commissioner & DDMA Chairman, Gregory Thejawelie-i iba sentong tenzüksü.

Tang tashi nung Kohima district kübok anogoshi aayanger nisung 7000 züngdangtetogo. Iba ya Kohima Municipal kübok ward aser colony tem den subdivision 7 kübok tesemtem nung alirtem lir.

Dry Ration Relief Package nung jang seret 10, dal, shini, metsü, piyaz & lasüng (mixed) seret kaka, mustard oil litre tesadang ka, süngojok 200 grams, temang aser sü shidokba sapon anana, masala aser chilli packets gram 100 dena lir.

Nisung shia nem Rs 550 indang relief package agütsür aser ibaji Rs 38.50 lakh shi adoker.

## India nung Covid vaccine agütsüdang nisung 26,000 timtem ajuru; 488 asü

**New Delhi, June 14, 2021 (Agencies):** India nung January 16 aser June 7, 2021 tsüingda Adverse Events Following Immunisation (AEFI) tatalokba 26,000 liasü aser vaccine agiba sülen nisung 488 asü.

Iba mapang tsüingda vaccine indang dose crore 23.5 agütsüo aser iba nungi AEFI tatalokba 26,200 ajurubaji 0.01% lir.

Iba ya anogo 143 tsüingda COVID-19 anema vaccine agir nisung 10,000 nungi ka dak temang nung timtem adok aser vaccine agir nisung lakh 10 nungi nisung 2 asüba ama lir.

"Vaccine agiba sülen AEFI timtem ya ajurur" ta Union health ministry-ia ashi.

India nung AEFI atalokbaji Covishield ajanga nisung 24,703 (94%) aser Covaxin ajanga nisung 1,497 liasü.

January 16 nungi tenzükür India nung Covishield indang vaccine dose crore 20 aser

Covaxin indang vaccine crore 2 ser tesadang agiija liasü.

### AEFI YA KECHI?

AEFI ya tapu asem lir. Mezüngbubaji vaccine agiba sülen temang metar, tashitsü atur aser ajem atudak awaker mesüra timtemer.

Tanabuba nung tashitsü atuba aser awakbaji tenük-telen tashi nung kongshir mesüra temang kanga metaa shiranger.

Tasembuba tapu nungbo temang nung timtem tulu adokba ajanga mozü kidang amongtsüsa akümer mesüra tasüba ajurur mesüra temang nung tenük-telen kar mapa meinyaki akümer.

# India nung AEFI atalokba nung nisung 24,901 (95%) ji terara timtem ajuruba dang liasü.

# AEFI tatalokba nung nisung 412 (2%) kanga timtem aser nisung 887 (3.39%) kanga mejungi shiranga liasü.

# Nisung 2,318 (8.85%) tashi mozü kidang amongtsüsa

aküm aser AEFI ajurur nisung 4,230 (16.15%) dak temang nung tanga tashidak liasü.

# India nung AEFI ajurur timba- nisung 11,859 (45%) dak temang meta shiranga liasü.

### VACCINE AGIBA SÜLEN ASÜRTEM:

AEFI timtem ajurur nisung 488 (2%) tashi taküm sama. Iba nung tebur 301 aser tetsür 178 liasü saka sorkar osang ajanga nisung 9 indang maitsübo memetetdaksü.

Tasürtem rongnung nisung 457 nem Covishield aser 20 nem Covaxin agütsü saka nisung 11 koba vaccine agütsü'ar shia mali.

### STATE BALALA NUNG AEFI ATALOKBA:

Maharashtra 4,521 (17.26%), Kerala (4,074), Karnataka (2,650), West Bengal (1,456), Uttar Pradesh (1,361), Gujarat (1,131) aser Delhi (1,111).

## Indian security forces-i NSCN tenüng menüktsütsü meranger

**Dimapur, June 14, 2021 (TYO):** Küm 20 tema Naga yimten olemtepa arudang Indian security forces-i ceasefire lima nung tensa mejungi kümdaktsütsü mapa inyaka arur aser tanga parnok NSCN tenüng menüktsütsü meranger.

"NSCN-i Assam nung tashiyim agi sen sarutsü atema Dimasa National Liberation Army (DNLA) den tesentaktep yangluogo ta security forces-i jembir. Ajsüaaka, NSCN

tashiyim agi sen sarutsü atema tanga telok amshitsü nungdak kecha madoker aser tashiyim agi sen mesarur, kechiyong onoki lenmang balala nungi ozüngi melaba ama tax saruteter" ta MIP, NSCN/GPRN-i sangdong ka nung metetdaksü.

Brigadier Chipemmi Shimrang-i DNLA den tesentaktep lir tai tongloksüba onoki magizükür kechiyong pa 2016 nungi Nagalim nung mali.

Anungji security forces-i pa tenüng amshibaji NSCN anema olulu proktsü atema dang lir, ta parnokisa ashi.

May 23, 2021 nü Karbi Anglong kübok Dugudisha nung sepaitemi DNLA züngsem 8 kaset saka parnok ya taila khatepba nung tepsetba lir. Anungji security forces-i taochi kecha melii nisung tepsetba nungi jenbuttsü atema NSCN tenüng mamshitsüla, ta MIP, NSCN/GPRN-isa metetdaksü.

## Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung chiang aser tzü aser juice jemang. Pei meyong mobile phone, kumesü aser toothbrush nung ama melentepa tamshi. Mozü achitsü agüja lira, aji shitak chiang. Tango junga mesashitba, teku ashiba, aketba aser temang metaba timtem lira yakta doctor bushiang.



Tir Yimiyim

## Aboi Area Students' Union-i Dr. Neiphrezo nem tenüngsang agütsü



Dr. Neiphrezo Soriiino-i nūburtem asoshi bilema inyakba atema Aboi Area Students' Union ajanga tepela temaitsü kulikaket ka agütsüba mapang tangokba noksa nung angur.

**Dimapur, Aami/June 14 (TYO):** Community Health Centre, Aboi nung front porch aser naro tsüki tasen yangluba meshiteta sarasademba aser tenüngsang agütsüba sentong ka June 14, 2021 nü agia liasü. Rev. Yeangphong Konyak lenisüba kübok Aboi Town Baptist Church ajanga tenla agütsüba nungi iba CHC nung front porch ya yanglua liasü. Kasa tesem nung naro tsüki ya Youth Director, Youngtok lenisüba kübok Aboi Town Baptist Church Youth Department ajanga yanglua anepalur.

Iba senden ya HCMC (Health Centre Management Committee) Aboi lia ADC, Chumlamo Humtsoe mendenpuba sür agi, kong civil society lenirtem dena liasü.

Health system tashi itshitsü atema nūburtem dang ayongzükba ama Aboi Town nung aliba arogo, civil society aser temolungertemi shilem agiba atema Dr. Neiphrezo Soriiino SMO I/c ajanga pelaba lemsatapa liasü.

Nūburi aginüba ajakbo sorkari meperitsütsü, saka loktiliba nung temelenshi bener

arutsü atema nisung ajak kasa tongti shilem lir, ta pai ashi.

NHP (Nagaland Health Project) kübok sentong balala, aser talisa nūburtem teyaritap, yangji aliba MLA aser temolunger temi tenla agütsüba ajanga ajanga Health centre ya kanga junga renlokogo, ta Dr. Neiphrezo-i ashi.

Iba health centre nung aliba staff temi teti lokti nūbudok, mürekmejuba maparen inyaka arur aser nisung shia pei akokba yari osettsüset tenlatepa aru.

Ajisüaka medical officer aser nurse tem agi anünga lir, aser iba atema Health Department nem mapang shia osang agüja arur, ta pai ashi.

Additional Deputy Commissioner-ia iba sentong nung arogo aser nūburtem dang shilem tajung agiba atema pelaba lemsatapa aser parnok nükjiding ulushitsü ayongzüka liasü.

SMO incharge Dr. Neiphrezo Soriiino-i nūburtem asoshi bendanga agütsür inyakba aser ano CHC Aboi nem sen 10,000 tenla agütsüba asoshi tepela temaitsü, Aboi Area Students' Union tir, Mankhat Konyak-i pa nem

kulikaket ka agüja liasü.

AASU ajanga Aboi nung aliba tangateter, arogo, ward nung tentet balala aser kija-kibong temi dang CHC Aboi asoshi teyari balala agütsüba atema pelaba lemsatapa liasü. CHC Aboi nung nübu agi peria meliaka tajungtiba nung nūbur tenzükba asoshi kaketshir temi CHC staff tem dang pelaba lemsatapa.

Sentong nung AASU tir Mankhat Konyak-i 'Importance of Health Management and Infrastructure' onük nung ajemdaker o tatsüka jembia liasü.

CHC Aboi nung tang MOs (Dentist aser GDMO) ana, staff Nurse pongu aser ANM ka lir. Staff tem ajak ya melentepa inyaksü tamakoktsü asünung parnok anogo kata anisüngzük mesüi 24x7 mapa inyaker.

Tang ama tashidak wara tamajung agi alima tesem ajunga sünger healthcare sector nung nübu tali nüngdaka lir. Anungji Nagaland sorkar aser Department of Health and Family ajanga tensa azüoktsü atema ketdangsurtem peria shimer yoktsüla, ta AASU tiri ashi.

## Pfutsero nung Special Vaccination Drive agi



**Dimapur, Aami/June 14 (TYO):** Block Task Force, Pfutsero ajanga June 13, 2021 nü Pfutsero Town Sports Complex nung Special Vaccination Drive sentong ka ayongzüka liasü.

COVID-19 tashidak menatapa aoba süngzü rakdangtsü nükjiding nung iba mozü agütsüba sentong ya

ayongzüka liasü. Iba anogo nisung 749 nem COVID-19 mozü agüja liasü.

Pfutsero Town Baptist Church ajanga healthcare worker aser security personnel nem chiyongtsü agütsüba aser KALOS Society ajanga iba vaccination drive ketdangsuba atema pelar, ta ADC &

Chairman, Block Task Force for COVID-19 Pfutsero ajanga ashi.

Maneni 14th Assam Rifles, D Coy, Pfutsero ajanga health worker aser mozü agir nem süngo jemdaktsüba aser nūbur lenirtemi yaritapba aser amalitepba atema pelar, ta BTF, Pfutsero ajangasa ashi.

## Wokha nung Taxi aser Auto Rickshaw tem Odd-Even nung jajatsü metetdaksü

**Dimapur, Aami/June 14 (TYO):** Deputy Commissioner & Chairman District Task Force Wokha, Orenthung Lotha ajanga sangdong ka nung, taxi aser auto rickshaw tem Odd-Even yimya nung jajatsü metetdaksü.

Driver aser passenger tem kumzüktsü atema tsünglanglen agüja aliba yimyatam amshitsü metetdaksü:

1. Taxi aser auto rickshaw tem tejaklen menden nung passenger kata memendaksüi timba agi passenger ana dang mendaksür jajatsü melar.
2. Passenger ka danga mask magi jajaba ngura, aibelener aser driver-na prong dang senchi sen 200 achitsü.
3. Taxi aser auto rickshaw driver temi trip aoba shia teti kongshiba tesem, talisa door knobs, door handles amala nung mesen tepsetba mozü akhatsüla aser gari nung hand sanitizer ayutsüla.
4. Driver temi RAT/RTPCR/ True Nat/CBNAAT indang COVID-19 negative test

report agütsütsüla aser parnok angati tendangtsü.

5. Government of India indang totuyuba nung shia aliba ama nisung ajuruba driver ajanga tekeratiba nung mozü agitsüla, COVID-19 negative test result bener senzütsüla, koba khen tendangbaji anogo 15 atema alitsü. Mozü doses tembanga agir aliba indang kuli kaket alirtem COVID-19 negative test result menüngdak.
6. Driver-i gari nung pa aser passenger tsüngta plastic barrier/sheet inoka amshira, item gari anir temi COVID-19 tendangba report bener senzütsü menüngdak.
7. Taxi/auto rickshaw stant nung nisung nungtepba aser külemi kazüba yimya mamshitsü.
8. Driver kar dak temang metababa, aketba, shirang aitba, chitetba/menemtetba samaba, aser saksü-pokshi ama COVID-19 symptom lira, idangjisa isolate süa tendangtsüla.



District Home Guard Office anasa, Upper Chandmari, Kohima nung April 24, 2021 nü mejangjaba nisung anati tetsür ka indang sen juli (purse) rakzükba dak sendakba nung Kohima Police ajanga June 14, 2021 nü Pholami, PO/PS - Pfutsero nungi Cüvovey Nakro'er jabaso arishi küm 21 tain Vetsüto Nakro aser Pholami, PO/PS - Pfutsero nungi Tavesü Getsa'er jabaso arishi küm 21 tain Shevotso Getsa pua liasü. Tena ya jenshia senzüa liasü aser Police temi kanga junga bushisüngdanga aruba sülen aiben meranger ang pua liasü.

## Mon nung shirangertemi doctor den video ajanga jembitettsü

**Dimapur, Aami/June 14 (TYO):** Mon nung shiranga alirtemi doctor balala den angati video consultation agitsü atema District Task Force (DTF) for COVID-19, Mon ajanga sabang ka agütsür. COVID-19 tetsübu nung nūburtemi mozüki semdangtsü memolungi aliba mapang iba maongka ya agütsür.

COVID-19 agir asür ya shilem 44 bo mozü kidangi arur anogo ana tsüngta asüba lir, anungji shiranger menur aruba sayur, ta Health department ajanga tawa ang sangdonga lir.

Nisung aika COVID-19 tetsübu nung mozü kidangi arutsüa tsübur. Nisung aika COVID-19 agi aser danga tashidak agi asür. Anungji parnok nem pei kidang nungi anisüngzüka doctor den jembitsü maongka agütsüner, ta Deputy Commissioner, Mon, Thavaseelan K ajanga osangbener dang ashi.

Shiranga alirtemi district hospital nung doctor tem den DocOn App ajanga angati video consultation agitsü akok. Mon nungi shirangertem dang sen atoktsü atema DTF ajanga DocOn Technologies Pvt Ltd den lungjemer inyak, ta pai ashi.

Mon district hospital nung consultation atema shimtetba doctor ter ya Dr Yingmei (Ear, Nose & Throat); Dr Ngampa (Physical Medicine & Rehabilitation); Dr Aman (Gynaecologist); Dr Yanang (Anaesthetist); Dr Paul (Pediatrician); Dr Pangkhat Konyak (General physician); Dr Kutho T Nyuwi (Surgeon); Dr C Longe Peter (Internal medicine); Dr AP Lemwang (Internal medicine) aser Dr I Simon Sumi (Dentist) alitsü.

Iba app ya Google Play aser App Store nungi download sütettsü.



Hombarnü Numaligarh Refinery Limited (NRL)-i Jorhat Medical College nung yipden 120 aliba Covid Care hospital ka yanglutsüogo. Iba nung yipden 20 aliba ICU dena lir. State sorkari Covid-19 anema raraba nung nungita yaria NRL-i iba mozü ki yanglutsü. (Jorhat, June 14)

### Kamrup district nung FCI jang bosta lakh 1 shi apu

**Guwahati, June 14, 2021 (Agencies):** Kamrup Rural district kübok nija godown ka nungi Assam Police-i Food Corporation of India (FCI) indang jang bosta lakh 1 shi puogo. FCI indang jang ya shishilembadak ayoktsü atema ayuba liasü.

Assam Police aser Kamrup (Rural) district administration na longjemer iba godown mita aodang jang yua aliba apu.

Tawa Kamrup Rural district nung Boko police station kübok Chhaygoan Industrial Development Centre, Chhatabari nung nija company indang godown ka nungi FCI indang jang bosta aika nguteta liasü.

Nadiar Par nung alir

yimertemi truck gari ka nung jang bosta sünga oshir bener oya angu aser parnoki temolung melemba agi police nem osang sangokstüba sülen iba inyakyim anema tapet mera agitsü lemtet, ta ketdangsür kati ashi.

Boko police station officer-in-charge, Sanjeet Roy aser Chhaygoan circle officer Jayanta Borah nati anir telok kati jang apu.

Truck driver aser handyman dang jungjunga asüngdangyaba sülen, iba nija company indang godown nung ochimashi maparen inyakba tema adok.

Ketdangsüri ashiba agi, "iba nija godown nungi FCI jang bosta (seret 50) lakh 1 aliba shi onoki puogo.

Iba nija company yagi parnok meyong brand tenüing amer jang tem tanaben packing sür sülen item jang ya Meghalaya-i yoker.

Chiyungtsü belentsü atema amshiba truck 13 tashi iba godown aser temeket tesemtem nungi police-i puogo.

Iba company-isa tanga tesem balalai jang bener yoker aser parnok inyakyim nung tim masüba maparen aika dena lir ama temolung melemba.

Jang 're-packaging' asüba maparen nung Maruti Quality Products Pvt Ltd (MQPPL) dena lir ta jangjatetogo.

MQPPL aser iba godown kibur Deepak Agarwal jenshir aser pa aputsü atema bushitepdar ta ketdangsürisa ashi.

### Arunachal nung nisung 134 dak Covid-19 putet

**Agartala, June 14, 2021 (Agencies):** Tesüiba ghonda 24 Arunachal Pradesh nung nisung 134 dak coronavirus aliba putet aser iba wara agi nisung ana süogo, ta state health department-i ashi.

Directorate of health services, Arunachal Pradesh ajanga sangdongba Covid19 bulletin nung, Deobarnü sample 3,739 shi tendangba nungi

sample 134 dak iba putet, ta shia lir.

COVID-19 aliba puteter rongnung nisung 51 tera shirangba yimya lir saka 83 dakbo shiragba yimya kecha mali.

Kasa mapang iba wara agi shiranga alir nisung 434 taneptsü angu.

Arunachal Pradesh nung iba wara adoker külen nungi nisung

31,282 dak Covid19 aliba putetogo.

Ano külen, iba wara agi shiranga alir nisung 28,252 tashi taneptsü nguogo. State nung Covid-19 nungi taneptsü angur 90.31% lir. Tang nisung 2,885 tashi anepaludar.

State nung iba tesashi wara adoker külen nungi tashidak puteter nisung 145 taküm samaogo.



Manipur kübok Churachandpur district nung Lamka College tesayurtemi chief minister N Biren Singh ket nung Chief Minister's Covid Relief Fund nem itasen nungi anogo ka indang taa tenla agütsü dang agiba noksa angur.

### Tinsukia nung nisung tepsetba atema 9 apu

**Tinsukia, June 14, 2021 (Agencies):** Assam kübok Tinsukia district nung telok kati nisung ka züksetba ken o nung police-i nisung 9 puogo.

Korjonga Borpathar yim nung arishi küm 28 tain Sarat Moran ji nashi auyar ka ta temolung melemba agi zükset.

Nisung telok jagi Moran süngzü agi aleneter kanga

mejungu azük aser temang yirutsü. Pa mozü kidang asü.

"Nisung pungu tepuokdadi yokogo aser pezü police ket nung lir. Onoki ASP ka lenisüba kübok special investigation team (SIT) tentetogo" ta Tinsukia SP Debojit Deori-i ashi.

Sarat Moran yagi tebu Prabeswar Moran (90) aser tetsü Ulapi Moran (85) na anepalua aruya liasü.

### Tripura nung dokan pezü rongdok

**Agartala, June 14, 2021 (Agencies):** Tripura kübok Narendra Nagar nung mi lendong tuluka adok. Damcherra ya Agartala nungi kilometer 170 shi pilar lir.

Deobar anepong atalokba mi lendong nung dokan pezü tashi mittsü küma rongdok.

Short circuit ajanga mi ya adok ama temolung melemba bilemer.

Deobar anepongi iba tesem nung alirtemi mi adokba ngua miremseperitem ( firefighter) dang osang metetdaksü.

Ajisüaka, firefighter tem mi adokba tesem tonga aruba mapang, dokan ajunga

rondokadoker liasü.

Dokan kiburtemi ashiba agi, iba mi lendong nung sen lakh 14 alang osettsüsettem samaogo.

Kasa mapang police team ka iba tesem tonga aru aser iba mi lendong adokba bushisüngdangtsü tenük.

Damcherra indang Block development officer, Pijush Deb-i mi lendong atalokba tesem jagi aritepa ao aser iba tatalokba indang asüngdangya liasü.

Damcherra administration-isa iba mi lendong nung takoksa angurtem nem senotsü teyari kar agütsüogo.

### Kaziranga anasa NH-37 nung 'speed metres' enokogo



**Guwahati, June 14, 2021 (Agencies):** Assam nung Forest Department-i National Highway 37 anasa Kaziranga nung speed metres enokogo.

National Highway 37 ya Kaziranga National Park ajanga süir aser küm shia Kaziranga nung arem shiruru noklang aika gari agi tsükseter.

Tzüngluruwa atongba ajanga Kaziranga National Park nung tesem aika tzü agi metsüngbanga lir. Iba ajanga shirururtem temai adoker

National Highway 37 nung jenoker.

National Park nung arem shirururtem tsüksetba aziüktsü atema ketdangsürtemi lenmang nung speed metres enokogo.

Kaziranga National Park ya Assam district asem- Golaghat, Karbi Anglong aser Nagaon kübok lir.

Tawa tu Nagaon aser Golaghat district administration temi National Highway 37 ajanga senzürtem asoshi speed limits latettsüogo.

### Goalpara nung bike auyar nisung 7 apu

**Guwahati, June 14, 2021 (Agencies):** Bike auyar telok indang maparen nung tetsükdaksü tulu adokdakja Deobarnü police-i Goalpara district kübok Dudhnoi tesem nung bike auyar nisung tenet puogo.

Parnok ket nungi motorcycle 18 tashi ngutet.

Tesüiba ghonda 48 tsünga Goalpara District kübok tesem balala nungi police-i motorcycle auyar nisung 17 apu aser

parnok ket nungi motorcycle 38 ngutetogo.

Goalpara police-i Twitter ajanga, tawa Meghalaya nungi motorcycle auyar telok ka indang züngsem ana tashi pua lir, ta metetdaksü.

Police-i pua alir telok ya Assam-Meghalaya arrtsü adena auyaba motorcycle tem shibelenba maparen nung dena liasü.

Police-isa parnok ket nungi gari asem tashi ngutet.



## TIR YIMYIM YIMOBILEM (EDITORIAL)

DIMAPUR SANGTENNÜ, AAMI (JUNE) 15, 2021

### Mozü kidang inyakertem nungittsüla

**T**ongpang rara tesashi nung sepaitem meluladaksüi anogo shia chiyongtsü bener oa chiajemdaksü ama, tanü asen lima nunga Covid-19 tashidak wara tongpang tesashi nung nokdakertem meluladaksüi tasü aser tashi itta nokdaktetsü atema, asenoki mozü kidang inyakertem ya kata mesendoki anepalutsüba kanga rongdak nungdak kümogo. Atangji, tang tashibo asen lima nung Corona tashidak agi shirangertem mozüki masem kima dena mejangtsüsa adenshiba tensa tia tashibo ajurua mali, saka nisunga aika süogo aser Covid mozü ki shia nung shirangertem anogo shia aruba angashir. Ajisüaka, asenok asoshi shisabolutsü tulutibaji Covid mozü kidang shirangertem adenshibaji masü saka mozü kidang inyaker, talisa, doctor aser nurse-tem dak Covid-19 tashidak mesen keta aliba putetba aser shirangadokba tebilemtsü ya asütsü. Tang shiranger kanga aikabo masüba agi dang ashi, asen lima nung Covid mozü ki aika nung doctor aser nursetem dak Covid putetba agi, meshirangyonga, joko tangar nungi pilaa alitsüsa akümba agi mozü kidang inyakertem kanga ajema kümdagi. Iba ama mapang nung ano tang dang nungi Covid wara mopong tesashiba aruagi mozü kidang masem Covid agi shirangertem aden shi nungbo, tasü mang agi kima yimdong asungtsüba mapangji aji asütsü. Iba ama tamajungba anogo asenoki majurutsüsa, ano tang dang nungi tekümdangba nung asenok alitsüla aser tangatetba nung asenoki akok tashi mozü kidang inyakertem doctor nuresetem nungi tenzüka ki aokertem tashi yaritsüla. Atangji, mozü kidang inyakertema akhidang dang nungi tangsa tekümdangba aser temulung tagütsüba inyaktsüla, kechiyong mozü kidang inyaktsü shimbaji shirangertem yaritsü asoshi shimba lir. Aji oda, tashidak tajung tamajung, tesashi mesashi kecha mali, mozü kidang inyakertem mapaji shirangertem yaria aneptsütsüba lir. Iba dang nungi tajungba alima nung mapa maka. Atangji, tashidak tajungbo mali, saka tashidak ajakji majung aser tesempatsüka, tarendaksüka aser tetsübuttsüka saka joko mozü kidang inyaktsü nangzükadokerji, tenangzükba nungi ajentsü makok. Yimjung mapang sepai inyaktsü shimdaksür rara adokdang mapa nungi anentsü bilemra mesüra rarai aotsü mejangrara mesüra tsübura, sepai asütsü shimdaksüba to pei tetsü taso lima kümzüküba agi masü saka ayongayonga ita sen chia linüba agi shimdaksü akümer. Itemjibo tasü mait pei tetsü taso lima ashioksürtem asütsü. Shiba südir süang aser koba mapa nung südir süang, pei jakla, shisatsü aser tangatetbaji mapang tajung nung masü saka tanü ama mapang tamajung nung dang jangjatsü. Ashiko, akhi mapang tajung nungbo teyarinü amato asübatu mapang tamajung nungbo tangua mangutsüa akok. Aji oda, mozü kidang inyakertem süli, asenok süli asenoki akhi mapang tajung nung nübortem asoshi mapang tajung inyaktsü jembiba to mapa kuma inyaktsüba tang mapangba ya lir. Asenoki mozü kidang orr yangji shirangertem meyaritetsü, kechiyong asenoki memetet saka shirangertem takok ngua yaridaksütsü asoshi asenoki sarasadema pei akok aser parnok nungdak yari yaritepra, iba jagi mozü kidang inyakertem temang aser tanüla nung tashi aittsü. Tashidakbo kanga tesashi, mozü kidangbo kecha maka aser inyakertem ajak shiranga adok ta asünungbo mozü kiji shibanga ayutsüsa akümtsü. Asenok asoshi lendong tulutibaji aji asütsü. Iba amaji mataloktsü atema Tsüngrem tenzükertemi mozü kidangi orr mozü kidang inyakertem asoshi sarasademjang, yimsüsür aser lokti lenirtemi mozü ki tonga orr parnok nungdak asungdang aser tulur tilar aser takar sensaker nati government dang nungi kecha meimlai mozü kidang inyakertem nungdak asungdangtepa bendenjang. Tongpang nungbo peiang machi sepaitem dangi yoker. Tang ya asenokang machi aser magi ser mozü kidang inyakertem dangi yoktsüba mapang lir. Asenoki shiranger meyaritetyonga, asenokji mozü kidang inyakertem nem chiyongtsü aser nungdak oset belentsür aser parnok asoshi sarasademtsürtem süra, asenok longjemer, iba tashi jagi asenoki Covid-19 tongpang ya akoktsü.

## OLEMSABANG

### KIBONG YANGERBA NUNG TETSÜ/ KINUNGTSÜ KA TENYAKTSÜ SHILEM

~ L. Kika Pongener

Alima nung Tsüngremi tetsür yangluba ya nükjldong kanga tuluka nung yanglua ta asadangteter. Alima nung tetsür mali asübo, alima ya azüngmeyadak tesem ka süla. Yimtsüng nungi tenzüker linük ka yimjung nung sunepa alitsüba, mesura mepetmesu tia nung alitsüba, item ajakji tetsür dak tuluba keta lir. Tetsür ajanga kibong aser alima rangbenji lemsa-lemsa-a teronem menema temenungratsü tesem ka kümdaksür. Teburji kechi kodakirnaka tesashi, oda Molosongzü aser Kiyi tzüko amai liaka, anük-anüka yimsaa yoktsü tetsür dak tashi lir. Kinungburtem anogo piyong pei mapa nung belemseta inyaker nikongdang kidangi shilangdang, kinungtsüi menurema ola-osu tanep agi jembidang, anogo piyong anibelega inyakba ajunga amaadoker. Chirnurtem school/college temer kidangi shilangdang tamasa kimkümdong nung ayaketdang 'Oja' ta ja-a ayaketer, aser idangji tetsü kidang mena lira tanürtem temulungjang idakji anisungzüker. Kinungburtem pei mapa nung aser chirnurtem school/college nung pur-medemer den jashiteper mesura tamakok kar ngur mepelai arudang, kodang kinungtsüi/tetsü-i menurema tepela jakden dener agizüker, item tejashi ajunga amaadoker.

Laishiba nung Apijemtsü shin o züluri "Shisa taka tetsür shiai pei ki yanger" ta ashi (A.Shin-14:1). Atangji kibong ka yangerba nung tetsü/kinungtsü ka shilemji tulu lir. Kibong ka nung achi-ajemba, inyaksangshi, rongsen ketdangsuba aser chirnur azüokyim, item ajak nung tetsü/kinungtsü ka shilemji tongtired amai lir. Kibong ka rongsenketzung jenjang ajungtsüba/majungtsüba ajungaji tetsü/kinungtsü ka shilem tuluba lir. Aji oda, kinungburi senotsü aika bener aruyongjia, tetsü kati aji timyimi ketdangsua mamshira, kibongji teti sensaka dang alitsü. Kodang kibong junga yangertedir, ibajagi yimtsüng ka junga yangertetsü, kodang yimtsüng ka junga yangertedir, idangji memeteti linük/alima rangbenji junga-adoktsü. Apijemtsü shin o züluri tetsü tajung kati inyakba mapa tongtipang aika zülua angur, item rongnung tongtipang kar agiteta asenoki shisadangi. A.Shin-31:14. "La shidi bener rong mesuk". Atangji laji kibong atema chiyongtsü/nungdakba osettsüset abenba rong ka mesuk, kibong ka rongsenketzung jenjang ajungtsüba, kaa-ita anisungzüka alitsüba tetsü/kinungtsü dak tuluka keta lir. T.15. "Manga alidang lai saker aser lar kibong nem chiyongtsü agütsür". Tetsü tajung kati aonung menua memejanger, anepongi saker chiyongtsü/sorochiok mapa ajak tiptema renema ademer alir. T.19. Lai angenba talungtsü nung la tekati ameter aser la tekati bangtemtsü nung ameter". Tetsü tajung kati azümesena kazüa malir, saka lar kibong atema mapa mazüngi meranga inyaker.T.23. "Yimti sungküm nung linük tebu-tedi rongnung amendang la kinungbu meteta adoker". Yimten/ arogo/loktiliba nung kinungpu adandang, pa jaklaliro/jembi-shinu yimya, aben-suoshi suboba, mapang amshiyim, chitem-aontem abenba, item ajak nungji pur-medemer dang numadangtsüsa tetsü/kinungtsü-i kanga junga renemer yoker.T.26. "Lai shisatsü kaa la tebang lapoker". Tetsü/kinungtsü tajung kati tebangtemeli lilia, pangdok-pangla-a tangar mulung yirutsüsa, mesura yimten/arogo/loktiliba nung mepetmesu/telemsa adoktsüsa ken o tutepa mejembir, mesura kinungpur majungoktsür. T.27. "Lar kibong mapatem lai junga repranger; aser azümesen chiyongtsü machir". Tetsü/kinungtsü tajung kati kibong mapatem tiptema/lirepatsüka inyaker, kilung teronem menema topur junga renemer. Aonsotsü, jang-otsü, metsü-mersu, sungo, shini-mamatsü, totzü-sapon etc. yamala lai kümdanga/züngkhanga ketdangsua amshiba agi senotsü aika endoktsüba, mesura kibong sensak tia-i aitsüba nungi kümzüker. Tetsü/kinungtsü tajung kati, la teka dena, nentak-nendaka, sungolemba/itsük-ontsü pasa ka dang asüyongjia teronem menema sorochioker, ibajagi lar kibong "Azümesen chiyongtsü" kodanga machir...Tetezü kanga junga mereprang ser ronglokdaksüba, metsü-mersu agi matu/meshitak, tasen agi matu/tali, yamaji mashi-mashi sorochiokba chiyongtsü kodanga machir. Atangji kibong ka anema pelaa, kaa-ita, tim-medemi alitsüba atema inyaksangshi mapa aser ketdangsuba ajak nungji tetsür/kinungtsü ka shilem tuluba ta asadangteter. Tanga ajak liaka, chirnur mapang shitak nung, tim lenmang nung azüoka, jenjang tajung (positions) tongteta yanglutsütsüba ajak dang tongtipangba asütsü. Aji oda, chirnur tim lenmang nung aniteta jenjang junga yanglutsütsüba, tetsü/kinungtsü kati nendak-nendaka mapang agüja inyaktsüla. Kanga tesasatsü-ka, kibong aika nung tetsü/kinungtsü-i chirnurtem tim tazüoktsü mapang shitak nung, lai mapang magütsütetba ajanga raksadaktsüba, talisa tanür tila chipang-nupang mapang, tetsü/kinungtsü ka kidang mamen kilir nem dang shiloka toktsür, loktiliba nung tali shilem agiba, senotsü bushiyim/shishilempaba mapa nung mapang tali endokba, kaa-ita lir ta sur chirnur nem senotsü parnok nungdakba dang nungi talila agütsüba, yamala ajanga chirnur tia tamajung kümdaksüba kibong aika lir. Chirnur mapang shitak nung azüoker, tim lenmang nung anitetbaji, Sungdong lu tuluka yimer, putu aika asoshi rongsen rizünga dang nungia tajungba lir. Chirnur mapang shitak nung azüoka jenjang tajung tongteta yanglutsütsüba, RCC ki tulu taren-taren atongtepa yanglua yutsüba aser Bank nung sen aika rizünga yutsüba dang nungia tajungba lir. Atangji tsürabur-i RCC ki tulu yanglua yutsüaka, kimong-alu aika alidena yutsüaka, Bank nung sen aika rizünga yutsüaka, chirnur mazüoki tia raksadaktsüra, rongsen jenti rizünga yutsüba ajungaji tangar kar atema dang asütsü, mesura Drugs gram ishika jenjang dang asütsü. Ano item dak alaka, kibong kaa-ita jenjang junga lia aliba, tesasatsü-ka sensak tia-i yir temeimtsü-ka kibong karbo lir. Itemji kodaser iba ama tia jagi aitsüsa aküm ta bushidangra, teimba ka tetsü/kinungtsü kati rongsen timyimi ketdang masüba, kinungbui memeteti senotsü apoba, kinungbui memeteti kimonglumong tashi nung teka aiba, ibala mesukba mapa ajanga kibong aiatai tia-i aiba karbo lir. Atangji kibong ka yangerba nung tetsü/kinungtsü ka shilem tuluba lir. Anungji tetsütem ajaki kibong ya mesen-mettoa senzüka metoktsüi kanga nendak-nendaka kümdanga ketdang asütsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Caritas International-i wara mapang India nunger yarir



India nung Caritas volunteers- Covid Samaritans nungi putir kati coronavirus tashidak agi asür ka asüpila sentong ketdangsua agiba noksa nung angur.

**June 14, 2021:** Alima nung Khristan charity telok balalai akümba Caritas Internationalis-i India nung coronavirus wara mapang India nunger maneni yaritsü atema tenla agüjang ta temeshishiba campaign ka tenzüka liasü.

India nung coronavirus case million 29.5 dak tema jungogo aser iba tashidak agi nisung 374,000 dak tema süogo.

Caritas Internationalis-i video documentary ka ajanga Tamil Nadu nung Caritas staff züngsem, Jacob-i kuli asüba sayaogo.

Jacob-i Tamil Nadu nung coronavirus wara mapang nisung jenti timtemba aser shirangertem oxygen mali timtemba osang lemsateo.

Paisa Caritas aser Arogo telok balalai timtemertem yariba aser hospital tem nung medical facilities aser staff tem mabensaba tebilemsü lemsatep.

Jacob-i inyakba mapa tajung atema tenüngsang agüja Caritas Internationalis nung secretary-general, Aloysius John-i,

"Caritas teloki yamai inyaker; kecha marendaki ajak tenlar," ta ashi.

"Jacob densema Caritas India nung züngsemtem aser volunteers-i anogo shia teyari agütsür; chiyungtsü, masks, disinfectants lemsür aser pei taküm samatsüa metsübui doctor tem den yariteper. Anogo shia tensa tamajungba akümdang aser teimla maliba mapang nung Caritas teloki teyari agütsür," ta John-i metetdaksü.

Caritas India-i first-level treatment centers 28 aser second-level centers 58 lapoka liasü aser item centers nung Caritas medical assistants-i shiranger 2,384 yariogo.

Caritas India-isa Covid Samaritans volunteers lemsükja nungdakbapurtem nem medical teyari aser oxygen agütsüba den külemi nisung aika nem teimla agütsüogo.

Caritas India-isa mask 35,000, food kits 35,000 aser medical kit 22,000 lemsüogo.

Taoba ita India nung coronavirus tensa tamajungba

mapang nung Caritas India executive director, Paul Moonjely-i wara mapang India nunger yaritsü atema ayongzüka liasü.

Moonjely-i, "Iba tensa ya kanga majung. Nisungtem hospital nung masemer aser hospital nung yipten peria maliba agi nisung jenti asür," ta metetdaksü liasü.

"India nung aliba Arogo nungi tenzükertem timtemertem yariba mapang nung aser adianu aika süogo," ta metetdaksü pai India nung timtemertem yaritsü ayongzüka sülen alima tesem balala nungi Caritas aser Arogo telok balalai tenla jenti agütsüogo.

India nung timtemertem yaritsü aser medical supplies agütsütsü atema Caritas Humanitarian Aid and Relief Initiatives Singapore (CHARIS) ajanga US dollar 224,556 saruteta liasü.

Caritas Australia densema alima tesem balala nung Caritas aser Khristan charity telok balalaia India nunger yaritsü ayongzüka liasü.

## Mozambique nung Islamic kiralongra ajanga nisung 800,000 jenshiogo

**June 14, 2021:** Khristan nütsüng timba aliba linük, Mozambique nung Islamic kiralongrartem timtem kanga agütsüba ajanga tesüiba ita asem tsüngda Palma yimti nungi Khristan timba ser nisung 75,000 dak tema shi jenshiogo, ta June 11, 2021 nü UN refugee agency-i sangdong ka ajanga metetdaksü.

Islamic kiralongrartem timtem agütsüba ajanga Mozambique kübok Cabo Delgado Province nunga nisung 5,000 shi jenshiogo.

Voice of the Martyrs Canada CEO, Floyd Brobbel-i, "Mozambique nung Kibuba sülen anidakertem yariang ta sarasademdaksüner. Arogo atsüngzüka maotsü atema sarasademdaksüner. Tamangertem kiyongertem meimtsüla aser tamangertem ajak alima atema metzü den tesangwa kaka asütsüla," ta ashi.

Paisa, "Yangi senden ayongzüka agütsü kanga tasak, ajisüaka onoki refugee camps nung Laishiba alemtsü aser Khrista osangtajung lemsateptsü atema maongka angur. Linük nung yimjung atema sarasademjang," ta mepishia metetdaksü.

2017 küm nungi Islamic State of Iraq and the Levant (ISIS)-i yaria Ansar al-Sunna-i aniba kiralongrar teloki Mozambique nung timtem kanga agüja arudar.

Kidanger linük, Tanzania-i par linük nung refugees agizütsü memelunger, ibayongji Tanzania nungi minzüka yokertem arrtsülen kanga timtemdar.

"Mozambique linük nungi ajenertem Tanzania nung mejenoktetba agi arrtsülen kanga timtemer. Rara agi kongshir aser kanga temekong süaka ki aser blankets mali

moapu nung mejangba agi aika shirangeper," ta UN refugee agency otongdar, Babar Baloch-i metetdaksü.

Aid to the Church in Need den jembidang Pemba nung aliba Arogo nung putir, Kwiriwi Fonseca-i, Islamic kiralongrartem tanur tetsürtebur noklang aika puer ogo, ta metetdaksü.

"Kiralongrartem raratsü atema item tanurtem nem kangshia traning agidaksür, aser tetsürtem tashiyim amshia raksatsüba sülen kibong kümdaksür," ta putirisa metetdaksü.

Southeast Africa nung aliba linük, Mozambique nung nütsüng million 30.1 shi lir, aser iba nungjagi nütsüng shilem 30 Protestant Khristan, nütsüng shilem 24 Catholic Khristan, shilem 17 Muslim nunger aser shilem 28 akhi yimsü amangertem lir.

## ANOGO ABEN TSÜNGREM DEN

### Temsüa jajaang

..., koba ajaba agi nenok ajak, iba ajaba temsüa jajatsü, Ni, Kibuba nung tepuokbai nenok dang mepishir. Efesa 4:1-3

Pauli Efesa 1-3 nung Khristan tesayuba aser Khrista nung tamanger ka jenjang indang jembu. Tang iba tapu nung tamanger mapa aser yimya lemsateptsü indang jembu. Pai pasasa Khrista nung tepuoker ka ta jembu aser tesem kar Tsüngrem aser Khrista asoshi talenba kilir taaka amshir. Pai tamang katetta aser tashi angaa Yisu sülen anidaksüba tasak ta metetdaksünü saka parnok tajaba temsüa jajatsü Pai ayongzüka. Tamanger tekümtet dangi ajaba nung Tsüngremi taochi talubusa sayu (Yn. 15:16), parnok tetemsü ta masü, saka tamangertem temsüa jajaba agi Pai aochiba sayutsüla.

Pauli asenoki anogo shia jajatsüba meraji tanü asenok dang sayur. Yisu jajaba ama jajaba, Yisui bilemba ama bilemba aser Yisui jembiba ama jembiba ajanga asenoki temsüa jajaba sayur. Kibubai asenok dak kongshia tasüngdangba ka asüngdang aser ibaji asenok ajaki langzütsüla. "Kechiba nenoki Kü dang Kibuba, Kibuba ta ajar, aser Ni ashiba meinyaker?" (Lk. 6:46). Asenoki kechi inyaksüla Pai shia lir.

Nai Kibuba ne Tsüngrem meimang, aser ne kiyonger meimang. Pai asenok tali tayongzüka agütsür: "Kü dang Kibuba, Kibuba ta ajar shiai kotak yimli-i aitsü masü, saka shibai kotak nung aliba Kü Bui mulungba ama inyakdir pa aitsü" (Matt. 7:21). Asenoki tejembidang mejembi, tejajaa jajatsüla; temsüa jajatsüla.

Tsüngrem, tanü Nai kü o tem aser mapatem anüksü ni Ne dang mepishir.

## Osangtajung kentener For King & Country-i musical film ana sayatsü



Joel & Luke Smallbone

**June 14, 2021:** Grammy Award anguba osangtajung kentener telok- For King & Country-i musical film ana sayatsü, aser iba film ji parnok kibong otsü aser kentenba tsütsü parnoki takok anguba otsü nung ajemdaker yanglu.

For King & Country nung züngsem anaji adianu- Joel aser Luke Smallbone na lir aser musical film anapronglaji Radiant Films & Monarch Media kübok sayatsü.

Osang angazükba agi, Australia nunger adianu Joel aser Luke nati feature documentary "Return to Sydney: The For King & Country Journey" sayatsü atema renemshidar aser iba film nung tena den tey aser ken zülur, Rebecca St. James nunger nungtugu akümba aser award anguba sülen par kidangi Australia-i meyipa aoba otsü lir.

Iba documentary ya Smallbone'er adianu, Radiate Films nungi Ben-i direct asü. Joel aser Luke Smallbone

nati sangdong ka ajanga, "Monarch Media & Radiate Films den partnership nung ozü kibongi ajangshia aruba reprangtsü atema onoki jaoker. Iba film nung tongtibang partners aser medemertem interview agiba densema lir," ta metetdaksü.

Monarch Media nungi Steve Barnett aser Alan Powell na den Andrea Royer nungeri iba project produce asütsü aser "Return to Sydney" executive producer temji Vicky Patel, Smallbone brothers, Luke & Joel aser tebu, David nunger lir.

For King & Country aser Monarch Media natisa "Unsung Hero" film sayatsü. Iba film ya Smallbone'er kibong Australia nungi United States-i oa aliba otsü nung ajemdaker yanglu.

"Unsung Hero" otsü ya Richard Ramsey-i zülü aser producer temji Barnett, Powell aser David Smallbone nunger lir.

Tawa Monarch Media-i Netflix musical feature "A Week Away" sayaa liasü.





Kolkata, June 14, 2021: Linük nung petrol aser diesel jenjang atuba anema Hombarnü Kolkata nung Ganga ayong anasa longkak aitertermi longkak aitba temaitsü scooter ka asüpila sentong agiba noksa nung angur.

### Centre sorkar den ken o jembitsü melunga lir: Rakesh Tikait

**New Delhi, Aami/June 14 (Agencies):** Hombarnü Bharatiya Kisan Union (BKU) lenir, Rakesh Tikait-i, aluyimertemi Centre sorkar den ken o jembitsü melunga lir; ken o jembitsü atema sorkari onok jaoktsüla, ta metetdaksü.

Paisa, linük tashi aittsüla, opposition tashi itta alitsüla aser "T asem" tashi aittsü atema lanurtemi shilem agitsüla, ta ashi.

Aluyimertemi Centre sorkari benokba aluyimba ozüing tasen asem anema longkak aitba indang poster rasaa ashidang pai, "T asemji- tank, tractor aser Twitter lir. Army nung lanurtemi tank anishir, lanur aluyimertemi tractor anishir aser tech-savvy temi Twitter anitsüla," ta ashi.

"Linük tashi itta yangertsü atema tashi tait opposition ka nüngdak. Tanü sorkar menden nung alirtemia taoba mapang

nung opposition shilem agia liasü," ta pai ashi.

"Opposition party tem densema onoki akhangba pusemertemi longjemer onok nungittsüla. Sorkari onoki akhangba agizükttsüsa akümtsü," ta paisa ashi.

Tawa Tikait-i West Bengal Chief Minister Mamata Banerjee ajuru aser aikati ibaji ashishiba dak sendakba nung pai, "Aluyimertemi longkak aitba nung yimtenren lenirtem aser politics maitdaksütsü ta lenirtemi nangzüka liasü. Aluyimertemi mener longkak aitba nungbo yimtenren lenirtem nem shilem magidaksütsü," ta metetdaksü.

Yaküm November 26 nungi tenzüka aluyimertem meyrjang aika Delhi arrtsülen adenshir tang tashi longkak aitar. Centre sorkar aser aluyimertem unions tsüingda senden 11 ben menogo ajisüaka tang tashi telemtetba

kecha magitet.

Aluyimertemi sorkar dang aluyimertem nem minimum support price (MSP) agüjang aser aluyimba ozüing tasen asemprong agienang, ta akhanger.

"Onoki maneni ken o jembitsü melunga lir, ajisüaka ken o jembitsü atema telatetba kecha makai sorkari onok jaoktsüla," ta pai ashi.

"June 26 nü Lucknow nung BKU züingsemtemi Angh nem temepishiba shidi ka agütsütsü. Iba anogo nungji nibo longkak aitba tesem- Ghazipur nung alitsü," ta pai ashi.

SKM-i, aluyimertemi longkak ait tenzüker ita 7 ajungba anogo- June 26 nü aluyimertemi linük tesem ajaklen Angh kitem anasa mener longkak aitsü aser linük Tir, Ram Nath Kovind nem-a temepishiba shidi agütsütsü, ta metetdaksüügo.

### June 16 nungi Taj Mahal densema ASI Monument ajak lapoktsü

**New Delhi, June 14 (Agencies):** June 16, 2021 nungi Taj Mahal densema Centre sorkari kümzüka-wazüka ayuba nüngshi kiojen aser museum ajak tanaben lapoktsü, ta Hombarnü Archaeological Survey of India (ASI)-i metetdaksü.

Coronavirus tanaben prokba ajanga India nung Centre-i kümzüka ayuba nüngshi kiojen 3,693 aser museum 50 tashi April 15 nungi shibanga liasü, aser item rongnung Taj Mahal,

Red Fort aser Qutub Minar densema lir.

ASI monument tanaben lapokba sülen item monument semdangtsü atema online ajanga ticket mekazüka yutetsü, ta ASI ketdangser kati metetdaksü.

Hombarnü Union Culture & Tourism minister, Prahlad Patel-ia twitter ajanga, "June 16 nungi India nung monuments ajak lapoktsü atema tanü @MinOfCultureGoI-i @ASIGoI nem temelaba agütsüügo. Corona telatetbatem

nung ajemdaker raliwalirtemi item monuments semdangtsü akok," ta metetdaksü.

Centre sorkar, state sorkartem, ministry aser department balalai wara dak sendakba tetuyuba balala metetdaksütsü, aser raliwalirtemi ajakji shidak benshitsüla, ta ASI-i metetdaksü.

Yaküma coronavirus wara prokba mapang March 17 nü ASI monuments ajak shibanga liasü, iba sülen July ita nung tanaben lapoka liasü.

### One Nation One Ration Card ajanga aayangertem ajangzüktsü: Centre

**New Delhi, June 14 (Agencies):** Hombarnü Centre sorkari Supreme Court dang, 'One Nation One Ration Card' scheme ajanga pei ki toktsür linük tesem balala nung aayanga senzurtem tajangzük angutsü, kechiyong parnoki linük tesem mashie ka nung fair price shop nungi jang ration agizükttsü, ta metetdaksü.

Iba scheme kübok tajangzük angutsü atema tangalen aayangertemi tang amshiba ration card amshitetsü, ta Centre-i metetdaksü.

Iba scheme kübok sorkari state shia nung jenjang kanga

ajemer jang agütsütsü, koba ajanga coronavirus wara mapang nung parnok yaritsü.

Centre sorkari affidavit ka ajanga, "May 20 aser May 25 anogotem nung States/UTs ajak dang ite schemes kübok jang agizükttsü metetdaksü; tangalen aayangertem aser pei kidangi mouteti alirtem densema NFSA kübok malir ajak nem jang agüjang ta tuyuogo," ta metetdaksü.

Taoba hopta Supreme Court-i state ajak dang One Nation One Ration Card scheme mapa küma inyangang, ta tuyua liasü.

### EAM Jaishankar-i Italy semdanga G20 FMs senden nung adentsü

**New Delhi, June 14 (Agencies):** India external affairs minister, Dr S Jaishankar-i June 29 nü Italy kübok Matera yimti nung ayongzükba G20 Foreign minister's senden nung adentsü.

Yaküm G20 senden ya Saudi Arabia leniba nung agia liasü saka wara aliba agi video conferencing ajanga dang senden agi.

June 29 nü G20 FMs senden nung tanga linüktema adentsü.

Yaküm G20 FMs senden nung India EAM, Jaishankar-i nisungtem bendanglen senzüba dak sendakba nung inyakyim ka latetsü benoka liasü aser itemji-standards on testing procedures, test results aser quarantine procedures lir.

2019 küm nunga Jaishankar-i Rome semdanga 5buba Mediterranean Dialogues nung aden, aser iba senden nungji lenir 40 dak tema aden.



June 14, 2021 nü New Delhi nung Gujarat nungi senior journalist, Isudan Gadhvi-i AAP nung adendang tangokba noksa nung angur. Kasa noksa nung AAP tongti aser Delhi Chief Minister, Arvind Kejriwal-a angur.

### India nung Covid agi ano nisung 3,921 süügo

**New Delhi, Aami/June 14 (Agencies):** Tesüiba hopta ana tashi India nung coronavirus tashidak agi asürtem kanga ajema akümba sülen tesüiba anogo ana- asem nung iba tashidak agi asür shilem 19 agi ano timba kümogo.

Tesüiba ghonda 24 tsüingda India nung nisung 70,421 dak coronavirus putet aser iba tashidak agi shiranger 3,921 asü; tang tashi nung linük nung nisung ajak agi 2,95,10,410 dak coronavirus putetogo aser iba tashidak agi asür 3,74,305 jungogo, ta Hombarnep Union Health Ministry data ajanga metetdaksü.

Tang India nung coronavirus tashidak agi teshirangdakpur 9,73,158 dang kümogo, aser ibaji coronavirus caseload nungi shilem 3.30 dang lir.

Tesüiba ghonda 24 tsüingda India nung coronavirus agi shiranger 53,001 anepogo.

Amongnü samples 14,92,152 tendang aser tang tashi nungbo linük nung samples ajak senteper 37,96,24,626 tendangogo, ta Health Ministry-i metetdaksü.

Linük nung iba tashidak agi shiranger 2,81,62,947 anepogo aser iba tashidak agi shiranger asüba shilem timba küma 1.27% jungogo.

Tang tashi nung linük nung coronavirus vaccine dose 25,48,49,301 agütsüügo.

Tesüiba ghonda 24 tsüingda coronavirus agi asür 3,921 nungji Maharashtra nung nisung 2,771 asüba, Tamil Nadu nung 267, Kerala nung 206 aser Karnataka nung 125 asüba densema lir.



June 14, 2021 nü 'World Blood Donors Day' anogomong nung Prayagraj (Uttar Pradesh) nung aliba sorkar hospital ka nung nisungtemi azü tenlaba noksa nung angur.

### China-i G7 lenirtem taitsuba magizük

**London, Aami/June 14 (Agencies):** G7 linüktem nungi lenirtemi, Xinjiang nung human rights dak senakba nung aibelen aser iba tesem nung nütsüing agia ajema aliba tekoltem aser Uyghur Muslim nungertem reshikangshia amshiba atema aitsüba ya yimden yimsüsüba tsütsü pei ajangzüksü atema ken o meyipsatsü merangba ka ta shia China-i lenirtem aitsüogo.

Kuli tejangia makai teyazü aser olulu osang dak ajemdaker linük telung ken o nung jushiba atema China-i bendanger lenirtem aija liasü. G7 linüktemisa Hong Kong nung pro-democracy longkak aiterem tashiyim agi azüoktsü merangba aitsüogo aser iba dak sendakba nung US tir Joe Biden-i, Beijing dang human rights international norms dak sendakba nung kümdangshia inyaksangshitsü shiogo.

London nung Chinese embassy-i official sangdong ka ajanga ashiba agi, "pei ajangzüksü atema yimden yimsüsüba tsütsü ken o meyipsatsü merangba den China telung ken o nung jushitsü atema Xinjiang dak sendakba ken o anara linük tenet yagi maongka agitsü meranger, koba onoki

magizüker." Embassy otongdar kati China sorkar indang official osang metetdaksüba mapa ashiba agi, China-i human rights aser fundamental freedom akhümtsübutüsü atema nangzükür lir.

Alima nung linük takartiba tenet yagi maneni coronavirus tashidak (Covid-19) poktetba dak sendakba nung science dak ajemdaker tanaben bushitsüdang ka sayutsü atema khangogo, ta sangdong ka ajanga metetdaksü.

Xinjiang tesem nung human rights dak sendakba nung aibelenba aser nüburtem kangshia mapa inyakdaksüba atema anüolen aliba linüktemi Beijing aija arudar. Xinjiang tesem nungya Uyghur Muslim nungertem aser lokti nung nütsüing agi ajema aliba kintem aika alir.

Xinjiang tesem nung Uyghur Muslim nung million ka shi internment camp nung ayuba atema global human rights telok aikati China aija arudar. Beijing-i ashiba agi, Islamic extremism raktoktsü atema iba jenjang ya agi, ajisüaka anüolen aliba linüktemi iba jenjang agiba ajanga human rights nung aibelener aser item nüburtem nüjiso agintsür, ta ashir.



Yogyakarta, Indonesia nung June 14, 2021 nü mass vaccination sentong ka ayongzükba mapang nüburtem COVID-19 mozü agitsü atatepa aliba noksa nung angur. Tesüba anogo ishika linük nung COVID-19 cases kanga sashia akumba ajanga Indonesia nung mozü agütsüba maparen asendenshir.

### COVID-19 mechi Pakistan-i linük 26 nemtenokdangba agütsü

**Islamabad, Aami/June 14 (Agencies):** Covid-19 tashidak prokshia aoba nokdangtsü atema Pakistan-i linük 26 nungi senzüsenpongertem nem tenokdangba agütsüogo. Tenokdangba agütsür aliba linüktem rongnung India-a densema lir.

National command and operation centre (NCOC)-i item linüktem ya "C category"-i idaktsüogo aser item linüktem nungi anüing/ali nungi Pakistan-i aitba senzüsenpongertem dak sendakba nung inyakyim asadangshio, ta Dawn sangdong ka ajanga metetaktüsü.

"A category nungi aliba linüktem nungi

senzüsenpongertem Covid-19 test asütsü nüngdak madoker. B category linüktem nungi Pakistan-i aiterem pei aliba tesem nungi mapuso tsüingda ghonda 72 jelia polymerase chain reaction (PCR) test agiba negative report sayutsü nüngdaker. Kasa mapang nung C category nung aliba linüktem nungi senzüsenpongertem NCOC guidelines kar dak ajemdaker dang Pakistan-i aitsü melatsü," ta ministry of national health services (NHS) nungi ketdangsur kati ashi.

Linük 26 nung India, Iran, Bangladesh, Bhutan, Indonesia, Iraq, the Maldives, Nepal, Sri Lanka, the Philippines,

Argentina, Brazil, Mexico, South Africa, Tunisia, Bolivia, Chile, Columbia, Costa Rica, Dominican Republic, Ecuador, Namibia, Paraguay, Peru, Trinidad and Tobago aser Uruguay densema lir. Item linüktem ya C category-i idaktsüogo.

"C category" nung aliba linüktem dak alia tanungba linüktem ajak "B category"-i idaktsüogo aser item linüktem nungi arurtem Pakistan-i aitba mapang PCR test result sayutsü nüngdaker.

Taoba ghonda 24 tsüingda Pakistan nung nisung 1,194 dak tashidak potetba den nisung 57 asüba osang sangdongba sülen iba tenokdangba agütsüogo.

## Israel nung sorkar tasen tentet; Netanyahu mapang süyiogo

**Jerusalem, Aami/June 14 (Agencies):** Benjamin Netanyahu küm 12 tashi Israel indang ato kilonser ama inyaka aruba tatem kati aruogo, kechiaser right-wing nationalist Naftali Bennett-i anir teloktep sorkar ka tentetba linük indang parliament ajanga Deobarnü agizük.

Parliament nung sorkar tasenba atema vote 60-59 agütsüba sülen menden 120 aliba Knesset nung menden trok agia aliba ultranationalist party tekolakba, Bennett ya ato kilonser inyaktsü tenangzüktep agi.

Bennett-i taoba mapang majangshidangba left-wing, centrist aser right-wing party tem tesendaktep sorkar ka anitsü, kong Israel nung Palestine nung senso tenüing nung tentetba party dena lir, shirnok nütsüing yongsük shilem 21 lir. Netanyahu atsüingdoktsü jangraba dak alaka item party nükjidong balala lir.

Melentepa inyaktsü züingzüktepba kübok Bennett ya ato kilonser ama küm ana inyaktsü aser iba sülen centrist lenir Yair Lapid-i melentsü, shiba iba sorkar tasenba yanglur tekolak lir.

Parnoki amokbanga aliba tesem nung aliba Palestine nungertem asoshi sentong balala yangluba nung mokongshitsü aser linük telungzük nung temelenshi atema rangloker inyaktsü. Ajisüaka ano maneni yimjung ken o jembitsü teimla



Abelen nungi, Avigdor Lieberman, Benny Gantz, Yair Lapid aser Israel indang ato kilonser tasenba Naftali Bennett nungertem Jerusalem nung cabinet senden mezüingbuba amendang tangokba noksa ka yangi angur. Israel parliament nung teloktep sorkar tasenba busema vote agüja Ato Kilonser Benjamin Netanyahu-i otsü yanglua küm 12 yimsü asüba tatem kati aruogo. Taoba mapang Netanyahu tembar alisang Naftali Bennett ya ato kilonser tasenba aküm.

mangunung, Palestine nung aser ayazüka ao. Küm ana tsüingta Israel indang election pezübuba March 23 nü agiba sülen par putu nung Israel yimten yimsüsür tashi tulutiba, Netanyahu-i sorkar tasen ka tentettsü mokoki liasü.

Arishi küm 71 tain Netanyahu ya pa busemertemi meimer saka pa anemer temi maginer. Pai ochimashi mapa inyakba indang ken o benoka tang tejembidak aliba tali tesashiba akumer, koba pai magizüker.

Pa ya parliament nung party tulutiba indang tekolakba alitsü, aser sorkar tasenba inyakyim ajunga nung pai kanga sashia anema nokdaksü imlar. Telok kati dang yutsüra, sorkar tasenba ya laotsü aser

Netanyahu nem ano maongka lapoktsütsü.

Netanyahu-i telemsa adokdaksütsü tasa amshia pa tejangraba nung sorkar ani, ta pa anemertemi aija arur.

Religious nationalist tetsüti aser occupied West Bank timba amokbangtsü jembia arusang Bennett-i vote agiteptsü lia parliament nung jembiba mapang linük telemsa ajiteta liasü.

Pai parliament nung jembiba mapang Netanyahu busemer temi meinpronga liasü, shirnok chamber nungi anir ao.

Bennett-i linük telungzük tebilemtsü indang timba jembia saka United States-i Iran indang nuclear deal taaben shia arudaktsütsü merangba anema jembia liasü.

Netanyahu nem ano maongka lapoktsütsü.

Netanyahu-i telemsa adokdaksütsü tasa amshia pa tejangraba nung sorkar ani, ta pa anemertemi aija arur.

Religious nationalist tetsüti aser occupied West Bank timba amokbangtsü jembia arusang Bennett-i vote agiteptsü lia parliament nung jembiba mapang linük telemsa ajiteta liasü.

Pai parliament nung jembiba mapang Netanyahu busemer temi meinpronga liasü, shirnok chamber nungi anir ao.

Bennett-i linük telungzük tebilemtsü indang timba jembia saka United States-i Iran indang nuclear deal taaben shia arudaktsütsü merangba anema jembia liasü.

"Iran-i par sasa nuclear nok-o-nü yanglua amtsü Israel-i memelatsü," ta Bennett-i ashi aser Netanyahu-i iba maparen anema nokdakba ama inyaktsü nangzük. "Iba tenangzüktep nung Israel madentsü aser maneni mapa inyaktsü temeden wazüka ayutsü."

Ajisüaka küm aika Israel yaria aruba atema Bennett-i Tir Joe Biden aser US dang pelaba lemsatepa liasü.

Pa sülen jembiba mapang Netanyahu-i tanaben sorkar tentettsü nangzük aser sorkar tasenba ya Iran asoshi tashi mait alitsü aser US taginüba ama Palestine nung aser jenjang ajemtsü, ta pai atakzüksü.

"Onok opposition nung alitsü tiaja lira, iba lendong aketba sorkar laodakja ozü yimya nung linük ani metenzük tashi tasü ita nokdaksü," ta pai ashi.

Netanyahu aser Bennett nati jembiba mapang Israel mitkar kübok Palestine nung million aika timtema aliba indang onük nung mokongshi.

Israel-i Occupied East Jerusalem nung aliba Sheikh Jarrah nungi Palestine nung kibongtem aridoktsü sentong yangluba mechi tensa mejungi lia sorkar melener.

Taoba ita Israel police temi Al-Aqsa Mosque compound nung amakdang Palestine nung aika yirua liasü. Iba sülen Israel mitkartemi Gaza Strip maka tanur 66 densema nisung 253 tepsetba sülen ceasefire ka agi rara soita lir.

## Vaccine agiba ajanga senti taküm ka kümzüksü akok: Yangseo



Kiphire, Aami/June 14, 2021: MLA & Chairman DPDB, Kiphire, T.Yangseo Sangtam den Deputy Commissioner, Rahul Mali, DBs aser tangar temi Hombarnü Covid Hospital, Kiphire semdangba mapang tangokba noksa ka yangi angur.

**Kiphire, Aami/June 14, 2021 (TYO):** Hombarnü (14.06.2021) DC conference hall, Kiphire nung Kiphire District Task Force senden ayonga agiogo, ta sangdong ka ajanga metetdaksü.

Iba senden agiba mapang, MLA & Chairman DPDB, Kiphire, T.Yangseo Sangtam-i, tang ama Covid-19 wara tensa tamajungdang vaccine agiba ajanga senti taküm ka kümzüksü akok, ta ashi.

Social media sabang ajanga vaccine dak sendakba nung olulu aser tiyazü osangtem

prokba nüburi mamangstüla ta metetdaksüba mapang, pai, tekümzüksü meratem agitsü asoshi vaccine agiadokstüla ta sensopurtem ayongzük.

Iba wara prokba azioktsü asoshi, yimtsüngtem nunga vaccination drive mapatong tenzüksütsüla, ta pai DTF züngsemtem ajungshia liasü.

Yangseo-i ashiba agi, yimtsüng nung yimsüser/tekolakpur temi medical team tem yimdak telungi maitdaksüi/nokdanga vaccination drive sentong nung tetsükdaksü madokdaksütsüla, saka iba

ama vaccination drive mapang yimsüser temi lenji oa medical team den longjemer inyaktüsü nungdaker.

Iba wara anema raraba mapatong tsütsü anibelem arema aser bendanga agütsür inyakba atema, Yangseo-i Administration, DTF, Medical Team, Front line workers, Tribal hohos, Civil Societies, Arogo lennirtem aser NGOs tem nem tenüngsang agütsü.

Kasa senden nung, Deputy Commissioner aser Chairman DTF, Rahul Mali, IAS-i ashiba agi, manemer aika temang nung timtem mejungi küma aoba sülen ang mozüki bushir, anungji nisung kar danga iba wara temaitsü agi timtemba metetra, yakta mozüki bushitsü asoshi pai mepishia liasü.

DC Mali-isa, District ajunga atema DTF inyakyim aser asalentong tem telok dang metetdaksü.

Maneni, MLA Yangseo-isa Covid Hospital nung Covid agi shirangertem semdang aser iba sülen District Hospital nung teyangludak aliba Oxygen Plant semdanga liasü.

Yangseo-i anogoshia ayangertem nem jang bag 400, Ayush mozütem, PPE Kits, N-95 mask aser layer mask tem tenla agütsü, ta kasa sangdong nung shia lir.

## Hrithik Roshan-i frontline workers nem teyari agütsü

**New Delhi, Aami/June 14, 2021 (Agencies):** Tang ama timtem mapang, nüburtemi parnok kümzüksü aser yaritsü asoshi actor aser actress dak teimla tulu ayur. Iba wara ajanga nüburi aika pei poksüng atema inyaktüsü tasüsa timtem tulu ajurudaki. Ajisüaka, iba ama tensa ka nung, tongtibang nisung aikati nüburtem den teka amteper parnok timtem angadanga yaria aruba osangtem ajanga angazükter.

Timtemer aser nungdakba pur nem teyari agütsür Bollywood star rongnung, Hrithik Roshan-ia mapang shia lenmang balala ajanga teyari agütsüdar aser ibaji ajanga tang ama tensa tamajungdang timtem nung alir nüburi aika anisüngzükdaksüogo.

Tang, superstar Hrithik-i ano tejak nembangba mask tem foundation ka nem tenla agütsüogo. Iba foundation yagi

tang ama mapang nungdakba pur tem nem teyari agütsür.

Tang ama tensa tamajungdang, yakpang ser inyakterem talisa sanitization worker, doctor, nurse aser maongka tajung manguba section nungi sensopurtem atema tejak nembangba mask ya kanga tongtibang ta asenok ajaki metet.

Hrithik-isa tesüiba anogo ishika tejakdang Cine and TV Artistes' Association (CINTAA) nung külem inyakterem asoshi iba tentet nung sen lakh 20 tenla agütsüba osang ajanga angazükogo. Iba den külemi pai jang-o-tsü tem agütsü aser iba mapa tajung ajanga tekübok jenjang nung alir nisung 5,000 jungnüa ajangzükogo.

Taoba küm, India nung mezüng Covid-19 wave ajanga nüburtem timtemba mapang, nungtugu actor yagi CINTAA nung lakh 25 tenla agütsü.

Hrithik-i agütsüba tenla ajanga iba company nung anogoshia ayanger artist aser parnok kibong tem nem teyari agütsüogo.

Mumbai Police nem hand sanitizer tem lema agütsüba den Covid-19 patient atema Oxygen Cylinder aser concentrator tem tenla agütsüba nungi tenzüksü, nüburtem timtemba ajiteta Hrithik-i meranga timtemer aser nungdakba purtem yaridar.

Covid-19 wara anema raraba tongbang nung, Hrithik dang masü tongtibang nisung aikati ayangertem nem teyari agütsüba osang balala ajanga angazükter. Industry nung inyakterem, shirnok lockdown ajanga mapa mengui kümadok, panrok nem teyari agütsütsü asoshi, tenla tajung agütsür rongnung Anushka Sharma-Virat Kohli, Priyanka Chopra-Nick Jonas, Akshay Kumar-Twinkle Khanna aser Salman Khan nung dena lir.



Longleng, Aami/June 14, 2021: Covid-19 hospital, Community Home Isolation Center (CHIC) aser Medical Quarantine Centre nung manemertem, Medical team aser Police tem atema Deobarnü (13.06.2021) District Tasks Force for Covid-19 tenüng nung District Administration, Longleng-i sorchioka aser parnok nem chiyongtsü agütsü. Parnok chiyongdaksüba dak alia, team-isa Covid-19 agi shiranga amungertem nem sempet agüja liasü, ta sangdong ka ajanga metetdaksü.



OFFICE OF THE

**AO SENDEN**

H.Q: MOKOKCHUNG : NAGALAND

Ph: 0369-2228896/ e-mail: aosenden@gmail.com

Date: 14-06-2021

### SANGDONGER

Taoba küm nungi alima ajunga nung WHO ajanga pandemic sangdonga aliba wara tashidak COVID -19 nokdangtsü aser asen Naga lima-a iba wara nungi kümzüksü alitsü atema Nagaland Sorkari anir Civil Societies aser lokti tentet balala ajaki longjemer nüburi aser rongsen jenti tenlatepa kanga dang meranga iba tongpang nung nokdaka arudagi. Ajiodo süaka iba wara asen limai nungpoka aiter tanü tanabuba tzüsem agi asen limaa kanga mejungi kongshia Naga nung senti taküm jenti iba wara ajanga taküm samadaksüogo. Item rongnung asen Aotsür Aor senso tajung kwika iba takoksa ajurur rongnung densemogo, ajak den Ao Sendeni kangadang sasaa nemjema bilemstür aser asür kibongtem ajak den asüku lemsateper.

Iba wara koktettsü asoshi Nagaland nung Chief Minister Arkotong sür Government nung tematiba bangtakpuri rongsen jenti indoka sentong balal yanglua inyakyim lateter, talisa Frontline worker tem aikati teka amuoka ia taküm agi tenlatepa iba tongpang raradagi. Asenok Mokokchung District nunga District incharge Wb. Metsubu Jamir, Minister-i anir District Task Force aser Frontline Worker tem aikati yimtsüng tilatiba tashi nung awajema oa iba tongpang nung noktaka arudar. Nenok ajak dang Ao kin ajak tenüng nung Ao Sendeni akhüm agütsür aser kanga pelaba metetdaksür.

Wara nungi jenbua aser kümzüksü alitsü atema temzüng ozüng Govt. bangtak aser Medical Dept.i latetstür nüburttem dang sangdonga lir. Aji oda süaka bangdakpur aser nüburttem rongnung aikati mapangshia item temzüng ozüng kübok manidakba ajiteter. Anungji iba wara tongpang koktettsü mechi nung ajaki julangjushi madoki item temzüng ozüng kübok tashi anga anidaksü tekümdangtsü Ao Senso ajak dang Ao Senden ajanga ayimoktsür.

(Chubawati Longchar)  
President

(Imtipokyim)  
Secretary

OFFICE OF THE  
**UNGMA SENSO TELONGJEM**

KOHIMA : NAGALAND

Regd. No. H/RS-1140 Dt. 17-10-2000

### TENÜNGSANG AGÜTSÜR

Wb. Sharingain Longkumer, Hon'ble Speaker (NLA), Constitution Tenth Schedule kupok Presiding officers indang Tashi lepa reprangshitsü atema ("To review the powers of Presiding officers under the Tenth Schedule of the constitution of the Rules made thereunder") züngsem 4 (four) committee nung Hon'ble Lok Sabha Shri Om Birla-i züngoksemba osang angashia Ungma Senso Telongjem-i (USTK) Tenüngsang agütsür, iba amala mesükba committee nung North East nungi shimbabo tang agi tanabuba tang lir aser paji shimtsü langa aser temsüa aliyong iba committee nung züngoksem ta jangjaba nung (USTK) numa atanger. Yamala nikongsutetba mapa aika nung takok ngua aotsüsa pa jakdang Tsüngremi len anitsü ozü sarasadem.

Sd/-  
CHUBAMAYANG JAMIR  
TIR (USTK).

Sd/-  
TEMJENSOWA JAMIR  
TONGTIZULUR (USTK).

### PRESS RELEASE

KOHIMA : LOWER PWD KOHIMA PANCHAYAT COUNCIL

#### TASEN SHIMA MAPA MELENTEPOGO.

- |                           |                      |
|---------------------------|----------------------|
| 1. CHAIRMAN               | : MEYI SANGLIR       |
| 2. VICE CHAIRMAN          | : SEYIO YIESE        |
| 3. GENERAL SECRETARY      | : ECHONGBEMO NGULLIE |
| 4. JT. SECRETARY          | : LOHRÜ              |
| 5. INFO & PUBLICITY SECY. | : ANONGO             |
| 6. TREASURER              | : DZIESEVITUO SUOHO  |
| 7. GAUNBORA (GB)          | : MEDOSALHUO         |

COUNCIL MEMBERS, ADVISORS, WOMAN CO-ORDINATOR ASER JURY BOARD SECRETARY-I ANIR TASENTEMAIKA SHIMA PARNOKI 2021-2026 TASHI INYAKTSÜ MAPA AGIZÜKOGO.

### Happy Birthday

Tenüng : Tiajungla Jamir (Tandan)  
Tasoba Anogo : June 15 Küm : 6  
Talidak : Nepale Kashiram, Dimapur.

Temeim jala küm 6 tashi Tsüngremer taochi nung len aniba asoshi pelaseta Tsüngrem tenüng asanger. Maneni Tsüngremi la nem arishi talang den anema aliba moajang ta onoki sarasademertsür.

~ Temeim Oja & Oba.



## Christian Eriksen temulungjang mapa minyaki aküm: Team doctor



**Aami/June 14, 2021 (Agencies):** Euro 2020 asayamung nung Finland den asayaba mapang Denmark nung asayar Christian Eriksen, temulungjang mapa minyaki akümba sülen ground nung lao, ta team doctor-i Deobarnü osang jangjatsüogo, ajisüaka kuli tang ashi mejangjai lir.

"Pa oadoker liasü; onoki pa shiarudaktsütsü merang, pa temulungjang mapa minyaki aküm. Defibrillation khen asüba sülen pa shia aru," ta Morten

laoba sülen asaya reprangtsü adenshia alirtem ajak olamadoki aküm aser par teammate temi pa meketbanger temang anepaluba sülen pa mozükidangi anir ao.

Denmark nung asayartem Eriksen den video conference ajanga sendaktepa arudar, ta Danish football association DBU director Peter Moller-i ashi.

Coach Kasper Hjulmand-i ashiba agi, Eriksen-i Honibarnü pa laoba indang aikabo meblemeter ta shiogo aser pa tanaben asayatsü matateter, ta shiogo.

"Kü dang nungi nenok tesashiba kongshi ama bilemer. Nibo tang training-i aotsü ama dang bilemer," ta Eriksen-i ashiba Hjulmand-i metetdaksü.

"Christian kanga küküma lir aser kechi atakoltsür mejangjai aliba sülen asayartem atema iba ya anisüngzük tuluka lir," ta Hjulmand-i ashi.

Eriksen tasayadak nung longdakba sülen asaya ghonda ka ser minute 45 lir tenzükshi, koba Finland-i goal 1-0 agi akok.

## French Open final asayatsü lia Tsitsipas-i tetsü asüba osang angazük

**Aami/June 14, 2021 (Agencies):** French Open runner-up Stefanos Tsitsipas-i, Deobarnü Novak Djokovic den asayamung final asayatsü tenzüktsü minute ishika dang lia tetsü asüba osang angazü, ta shiogo.

Hombar anepdang Instagram post ka ajanga arishi küm 22 tain Greek nung asayari pa atema mezüngbuba Grand Slam final ya tetsü nem bendanga agütsüba lemsatepogo. Final asaya ya Djokovic-i 6-7 (6/8), 2-6, 6-3, 6-2, 6-4 agi koka liasü. Taküm French Open akokba densema pai Grand Slam 19buba kokogo.

"Taküm ya takok aser tamakok dak dang ajak

sendaka mali. Ajisüaka taküm ya kija süang tangar den süang mapang ajak nung jangradema alitsü aser taitsuba aser timtem tekangshi melel tatishitsü keta alitsüla. Asayamung koka benjungtsüji tongtibang saka aji ajak masü," ta Tsitsipas-i zülutsü.

"Court-i aitsü minute 5 dang anunga lia kütsü süadok. La kanga shisa taka tetsür ka liasü aser lai taküm dak tamang akaba, tangar nem agütsünüba ya ni meteta aliba nisung shinga dena medem dangtsü makok. Iba alima nung la ama nisung aika nungdaker, kechiyong la amala nisung kati na kükümdaktsür. Kechi atalok aji ajak toktsür ni iba asaya la nem dang bendanga

agütsür. Kübu anitetba atema kanga pelar, pa medeni iba ya takoktsü ka mesüla," ta pai ashi.

2008 küm Nadal-i Roland Garros akokba sülen Tsitsipas ya tebur kija asayartem rongnung iba asayamung final tongteta asayar tanobusang kümogo aser pa Greek nung rongnungi Grand Slam ka akoker mezüngbuba asayar akümtsü merangdanga liasü. Asaya nung Djokovic-i tajungba asayayonga ao aser kasa mapang nung Tsitsipas asaya yimya tetenzük amai mesüi aküm. Set tasembuba nung Tsitsipas telongpu nung timtem adoka anepalu saka iba timtem ajanga tamakok angu masü pa ta shiogo.

## World Test Championship akoker nem USD million 1.6 agütsütsü

**Aami/June 14, 2021 (Agencies):** Taruba World Test Championship final India aser New Zealand na asayaba sülen takokertem nem senper USD million 1.6 aser iba den Test Championship Mace agütsütsü, ta International Cricket Council-i Hombarnü metetdaksüogo.

Iba naroküm atema India aser New Zealand na Southampton nung June 18 nungi tenzuka asayatsü.

"Ajaki kanga yongya ataa aliba India aser New Zealand na ICC World Test Championship (WTC) Final asayaba sülen takoker nem USD million 1.6 aser ICC Test Championship Mace agütsütsü," ta ICC sangdong ka

ajanga metetdaksü. "Final nung tamakok anguba team nema senpet USD 800,000 agütsütsü. Küm ana shi team teku toktepa aruba sülen Test cricket jenjang tasen kati ajungketa cricket asaya formate talangtiba nung official world champions title team ka nem agütsütsü."

ICC-isa, team teku rongnung tasembuba nung tembangba team nem senpet USD million 450,000 agütsütsü aser pezububa nung tembangba team nem senpet USD 350,000 agütsütsü ta metetdaksüogo.

"Jenang pongububa nung tembangba team nem USD 200,000 agütsütsü aser tanungba team pezü nem USD 100,000 agütsütsü," ta kasa

sangdong ajanga metetdaksü.

Test cricket ajungkettsü atema World Test Championships mezüngbuba nung team teku küm ana shi asaya aruogo.

Mezüngbuba Test world champions akokba team nem Test Mace agütsütsü, koba taoba mapang ICC tebur Test Team Rankings nung temaba jenjang nung tembangba team nem agütsü liasü.

"Final asaya kasasa nung tembangra final nung asayaba team ana ya mezüngbuba aser tanabuba jenjang atema senpet sen lezmüktsü aliba lemdangtsü aser Mace-a lemsatepa agütsü aser iba mapang team anaprongla champions ama züngshitsü," ta ICC-i ashi.

## Rahim & Bryce na nem ICC players of the month naroküm agütsü

**Dubai, Aami/June 14 (Agencies):** Taoba Bangladesh captain Mushfiqur Rahim aser Scottish tsür Kathryn Bryce na nem Hombarnü May ita atema ICC Players of the Month naroküm agütsüogo.

Takokertem osang ICC-i sangdong ka ajanga metetdaksa liasü.

May ita Mushfiqur, Sri Lanka den Test ka aser ODI asem nung asayaa liasü aser pai tanabuba ODI asaya nung run 125 yanglua Bangladesh team-i ODI asayamung ka nung tang mezüngbuba Sri Lanka akokba nung teyari tulu agütsü.

May ita Mushfiqur-i kanga junga asayaba tenüngsang agüja, taoba mapang India nung batsman VVS Laxman-i ICC Voting Academy tenüng nung, "küm 15 sülena pai maneni temaba jenjang nung asayateter. Run yanglutsü

asoshi Mushfiqur tejangraba ano mesamai lir," ta ashi.

"Ita tsüngda pai ajangzüktebatem ya Bangladesh-i ODI nung tang mezüngbuba Sri Lanka akokba ajanga tali shisangdaktsür.

"Middle order nung aita batting amenba den wicket-keeper shilem agiba ajanga pa sempet aser fitness jenjang sayur," ta Laxman-i ashi.

Kasa mapang nung Bryce ya Scotland nung asayartem (tetsür/tebur) rongnungi top 10-i aiba mezüngbuba asayar kümogo. La tawa sayaba MRF Tyres ICC Player Rankings nung top 10 asayartem rongnung züngoksemogo.

May ita Ireland den T20 asayaba mapang Bryce-i run 96 yanglu aser wicket pongu agia liasü, aser ibayongji la nem ICC Players of the Month naroküm agütsüogo.

## Bengaluru FC Assistant coach asütsü Moosa shim



**Aami/June 14, 2021 (Agencies):** Bengaluru FC-i Naushad Moosa den küm asem atema tenangzüktepa ka yangluogo. Pa club den 2023-24 season tashi sendaktepa alitsü. Moosa ya club indang youth development programme in-charge liasü, saka pai tang chief coach Marco Pezzaiuoli nem teyari agütsütsü.

AFC Pro-Licensed coach Moosa, shiba 2017 küm Bengaluru FC nung arua aden,

pai tenangzüktepa yangluba sülen Honibarnü ashiba agi, "Bengaluru FC nung küm asem inyaktü atema tenangzüktepa yangluba atema ni kanga pelar. Küm ishika inyakba mapang lanur asayartem aika tejakdangi atuba nguogo aser talisa taoba küm lanur asayartem aika senior team-i iogo. Item asayartem yagi team nung parnok jenjang akang akanga yangertetsü aser asayatetsü imlaa atar."

Moosa taoba mapang India, Churchill Brothers, East Bengal FC, Mahindra United aser Mohammed Sporting nungi asayaogo. Bengaluru FC reserve team head coach ama pai 2019 aser 2020 küm team BDFA Super Division League title takok dangi aniogo.

2020-21 Indian Super League (ISL) campaign nung Moosa-i khen atema Bengaluru FC team anir asayaa liasü aser tawa AFC Cup qualifying campaign nunga pa Pezzaiuoli den külemi inyakogo.

### **BILEMDANGANG**

**"Teyangluba oset  
ajak tagidak lir."**